

САНАЛ АВАХ БАЙРАНД БАЙРЛУУЛАХ ХЯНАЛТЫН КАМЕРТ
ТАВИГДАХ ШААРДЛАГА, ТҮҮНИЙГ БАЙРЛУУЛАХ, АШИГЛАХ
БОЛОН БИЧЛЭГИЙГ ХАДГАЛАХ, ХАМГААЛАХ, УСТГАХ
ЖУРАМ

Нэг. Ерөнхий зүйл

1.1. Энэхүү журмаар Монгол Улсын Ерөнхийлөгчийн сонгуулийн санал авах байрны хэвийн үйл ажиллагаа, аюулгүй байдлыг хангах зорилгоор санал авах байранд байрлуулах хяналтын камерт тавигдах шаардлага, түүнийг байрлуулах, ашиглах болон бичлэгийг хадгалах, хамгаалах, устгахтай холбоотой харилцааг зохицуулна.

1.2. Санал авах байрны хэвийн үйл ажиллагаа, аюулгүй байдлыг хангах, хяналтын тооллогын ажиллагааг баримтжуулах зорилгоор санал авах байруудад хяналтын камер байрлуулна. Төв суурин газраас алслагдсан баг дахь санал авах байранд хяналтын камер байрлуулж болно.

1.3. Санал авах байранд хяналтын камер байрлуулах, тавигдах шаардлага, камерыг ашиглах болон бичлэгийг хадгалах, хамгаалах, устгах үйл ажиллагаанд Монгол Улсын Үндсэн хууль, Сонгуулийн төв байгууллагын тухай хууль, Монгол Улсын Ерөнхийлөгчийн сонгуулийн тухай хууль, Төрийн болон албаны нууцын тухай хууль болон бусад хууль тогтоомж, стандарт болон энэхүү журмыг мөрдлөг болгоно.

1.4. Сонгуулийн байгууллагын ажилтан, мэдээллийн технологийн багийн гишүүн санал авах байрны дүрс бичлэгийн техник хэрэгслийн хэвийн ажиллагааг хангаж, хариуцсан хэсгийн хорооны дарга хяналт тавьж ажиллана.

1.5. Санал авах байранд хяналтын камер байрлуулах, ашиглах болон бичлэгийг хадгалах, хамгаалах, устгах үйл ажиллагаанд Монгол Улсын Ерөнхийлөгчийн сонгуулийн тухай хуулийн 6.4-д заасан зарчмаас гадна техник технологийн дэвшлийг ашиглах, аюулгүй байдлыг хангах, сонгогч саналаа нууцаар, чөлөөтэй илэрхийлэх боломжийг хангах зарчмыг баримтална.

Хоёр. Дүрс бичлэгийн техник, хэрэгсэлд
тавигдах шаардлага

2.1. Санал авах байранд суурилуулах дүрсний, дуу-дүрсний мэдээллийг цуглуулах, хадгалах, ашиглах боломжтой дүрс бичлэгийн техник, хэрэгсэл нь Монгол Улсын стандарт MNS6423:2019 “Телехяналтын системийн техникийн ерөнхий шаардлага”-ыг хангасан байна.

2.2. Санал авах байранд стандарт, техникийн шаардлага хангаагүй хяналтын камер байрлуулахыг хориглоно.

2.3. Санал авах байранд байрлуулсан хяналтын камерт гэмтэл, саатал гарсан тохиолдолд дараах арга хэмжээг авна:

2.3.1. мэдээллийн технологийн багт шуурхай мэдэгдэх ба гэмтэл, саатлыг арилгах арга хэмжээ авах, боломжгүй тохиолдолд мэдээллийн технологийн багаас туслалцаа авах;

2.3.2. гэмтэл, саатал, эвдрэлийг богино хугацаанд засварлах боломжгүй, нөөц төхөөрөмж байхгүй тохиолдолд энэ талаар тэмдэглэл үйлдэн бэхжүүлж,

хэсгийн хорооны дарга, гишүүд, хамгаалалтын үүрэг гүйцэтгэж байгаа цагдаагийн алба хаагчид танилцуулж, гарын үсэг зуруулна;

2.3.3.хяналтын камер хэвийн ажиллагаанд шилжсэний дараа тэмдэглэл үйлдэн хэсгийн хорооны дарга, гишүүд, хамгаалалтын үүрэг гүйцэтгэж байгаа цагдаагийн алба хаагчид танилцуулж, гарын үсэг зуруулна.

2.4.Хяналтын камерт гарсан гэмтэл, саатал, эвдрэлийг засварлах боломжгүй, тохиолдолд нөөц төхөөрөмж байрлуулах тохиолдолд энэ журмын 2.1-т заасан шаардлага хамаарахгүй.

Гурав.Дүрс бичлэгийн тоног төхөөрөмжийг байрлуулах, хураах

3.1. Сонгуулийн санал авах байрны гадна болон дотор талд хяналт тавих зорилгоор орчны нөхцөл байдалд тохируулан 4 (дотор 2, гадна 2) буюу түүнээс дээш тооны хяналтын камерыг бичлэгийн төхөөрөмжийн хамт суурилуулна.

3.2.Хяналтын камерыг сонгогчийн саналаа нууцаар гаргах эрхэд саад учруулахгүйгээр байрлуулах бөгөөд дараах байдлаар байрлуулна;

3.2.1.гадна орчин нь санал авах байрнаас гарах, орох хэсэгт;

3.2.2.дотор талд санал авах байрны дотор орчныг бүрэн харагдахуйц байдлаар.

3.3. Хяналтын камер энэ журмын 3.1-д заасан шаардлагыг бүрэн хангасан, дотор болон гадна орчинд суурилуулах боломжтой, дүрс бичлэгийг дамжуулах төхөөрөмжтэй байна.

3.4. Бичлэгийн төхөөрөмж нь энэ журмын 2.1-д заасан шаардлагыг бүрэн хангасан, хяналтын камераас өгөгдсөн бичлэгийг хадгалах, нөөцлөх төхөөрөмжтэй байна.

3.5. Санал авах байранд сонгуулийн хэсгийн хороо бэлтгэл ажил хангах, санал авах явц, саналын хайрцгийг шилжүүлэх хүртэлх хугацааг хяналтын камераар бүрэн баримтжуулна.

3.6. Саналын байранд ажиллах мэдээлэл технологийн багийн гишүүн, даамал, эсхүл техникийн ажилтан нь дүрс бичлэгийн төхөөрөмжийг суурилуулах, тохируулах, хэвийн ажиллагааг хариуцан ажиллана.

3.7. Санал авах байрыг эзэмшиж, өмчилж, ашиглаж байгаа иргэн, аж ахуйн нэгж, байгууллага нь дүрс бичлэгийн техник хэрэгслийн сүлжээний болон цахилгааны тэжээлийн тасралтгүй хэвийн ажиллагааг хангах үүрэгтэй.

3.8. Саналын хайрцаг шилжүүлэхэд дүрс бичлэгийн төхөөрөмжийг хамтад нь хурааж авах ба дүрс бичлэгийн төхөөрөмжөөр эсвэл бичлэгийг мэдээлэл зөөвөрлөх төхөөрөмжөөр Сонгуулийн ерөнхий хорооны дэргэдэх Мэдээллийн технологийн багт хүлээлгэн өгнө.

Дөрөв. Дүрс бичлэгийг ашиглах, хориглох зүйл

4.1. Санал авах байрны аюулгүй байдлыг хангаж буй цагдаагийн алба хаагч, зохион байгуулагч, мэдээллийн технологийн багийн гишүүн, даамал дүрс бичлэгийн төхөөрөмжөөр дүрсний хяналт тавьж, үйл ажиллагаандаа ашиглана.

4.2. Улаанбаатар хотод байрлаж буй санал авах байрны хяналтын камерыг цагдаагийн байгууллагын теле хяналтын нэгдсэн сүлжээнд холбохдоо интернэтийн болон оператор компанийн сүлжээ /мэдээллийн аюулгүй байдлыг хангасан/-г ашиглан зохион байгуулж болно.

4.3. Дүрс бичлэгийн төхөөрөмжид хандах хэрэглэгчийн нэр, нууц дугаарыг мэдээллийн технологийн багийн гишүүн, даамал хариуцна.

4.4. Дүрс бичлэгийн техник хэрэгслийг асаалттай үед цахилгааныг салгах, камерын байршлыг өөрчлөх, харагдах орчныг хязгаарлахуйц эд зүйл тавихыг хориглоно.

4.5. Иргэн, нэр дэвшигч, нам эвслээс гаргасан гомдол, санал, хүсэлтийн дагуу сонгуулийн санал авах байранд гарсан гэмт хэрэг, зөрчилтэй холбоотой үйлдлийг шалгахад эрх бүхий албан тушаалтны шийдвэрээр дүрс бичлэгийн төхөөрөмжийг шалгаж, бичлэг хуулбарлах ажлыг зохион байгуулна.

4.6. Санал авах байрны дүрс бичлэгийг Сонгуулийн ерөнхий хорооны даргын зөвшөөрөлгүй хуулбарлан гадагш гаргах, дамжуулах, устгахыг хориглоно.

Тав. Дүрс бичлэгийг хадгалах, хамгаалах

5.1. Хяналтын камерын дүрс бичлэгийг Архивын ерөнхий газрын 2012 оны А/34 дүгээр тушаалаар баталсан “Кино, дуу, дүрсний баримтын хадгалалт, хамгаалалтын заавар”-ын дагуу архивлан, хадгалах ба нэгдсэн дүрс бичлэгийн төхөөрөмжид шилжүүлэн хадгалах тохиолдолд видео тоглуулагчид ажиллах формат /MP4, AVI/-аар хөрвүүлэн хадгална.

5.2. Нэгдсэн дүрс бичлэгийн төхөөрөмж /Storage, NAS/-ийг хэвийн найдвартай ажиллагааг Сонгуулийн ерөнхий хорооны Мэдээллийн технологийн баг хариуцна.

5.3. Мэдээллийн технологийн багийн гишүүн, даамал санал авах байрны явцын бичлэг хийх, төхөөрөмжүүдийн хэвийн ажиллагаа болон төхөөрөмжийн цаг хэвийн зөв ажиллаж байгаад тогтмол хяналт тавьж шалгана.

5.4. Сонгуулийн тойргийн хорооны дарга, дүүргийн Засаг даргын тамгын газрын дарга дүрс бичлэгийн техник хэрэгслийг бүртгэх, олгох, буцаан авах, хадгалалт, хамгаалалтад хяналт тавина.

Зургаа. Дүрс бичлэгийн төхөөрөмжөөс бичлэг устгах

6.1. Санал авах ажиллагаа дуусах үед Мэдээллийн технологийн багийн гишүүн, даамал, зохион байгуулагч, цагдаагийн алба хаагчийн бүрэлдэхүүнтэй дүрс бичлэгийн төхөөрөмжийг унтрааж, Сонгуулийн ерөнхий хороонд камерын дүрс бичлэг, төхөөрөмжийг шилжүүлэх бөгөөд, сонгуулийн үр дүн баталгаажсанаас хойш 6 сарын дараа Сонгуулийн ерөнхий хороо бичлэгийг устгах эсэхийг шийдвэрлэнэ.

Долоо. Хариуцлага

7.1. Энэхүү журмыг зөрчсөний улмаас дүрс бичлэгийн техник хэрэгсэлд эвдрэл гарч санал авах байрны камерын хяналтад саатал гарсан, дүрс бичлэг хийгдээгүй, зөвшөөрөлгүй бичлэг гадагш гаргах зэрэг хохирол учруулсан тохиолдолд буруутай этгээдэд холбогдох хуульд заасны дагуу хариуцлага хүлээлгэнэ.

--oOo--